

三秦记（东汉）辛氏 撰

山陵

秦名天子冢曰长山汉曰陵故通名山陵

地市

骊山始皇陵作地市生死人交易市平不得欺死人云秦王地市有断马利

太白山

太白山不知高几许俗云武功太白去天三百山下军行不得鸣鼓角鸣鼓角则疾风暴雨兼至也

陇坂

陇西关其阪九回不知高几里欲上者七曰乃越高处可容百余家下处数十万户其上有清水四注俗歌曰陇头流水鸣声幽咽遥望秦川肝肠断绝去长安千里望秦川如带关中人上陇者还望故乡悲思而歌则有绝死者

沙角

河西有沙角山峰嵒危峻逾于石山其沙粒麓色黄有如一糲又山之阳有一泉云是沙井绵历今古沙不填满人欲登峰必步下入穴即有鼓角之音震动人足

温泉

骊山汤泉旧说以牲祭乃得入可以去疾消病俗云秦始皇与神女游而忤其旨神女唾之则生疮始皇怖谢神女为出温泉而洗除后人因以为验

兰池

秦始皇作兰池引渭水东西二百里南北二十里筑土为蓬莱山刻石为鲸鱼长二百丈

城赤色

长安城中地皆黑壤今城赤何也且坚如石如金父老相传云盖凿龙首山中土以为城及诸城阙亦然

织锦城

梁山宫在好畤城皆文石名织锦城

未央

未央一名紫微宫

桂宫

未央宫渐台西有桂宫中有明光殿皆金玉珠玑为帘箔缀明月珠金砌玉阶昼夜光明

豹林谷

在子午谷

凤阙

柏梁台有铜凤因名凤阙

韦曲

在皇子陂之西

杜门

即青门

子午

子午长安正南山名

始平

长安城北有始平原数百里无山川湖水其民井汲巢居井深五十丈有伯夷墓人采薇可常食或云夷齐食三年颜色如故

白鹿

周平王东迁有白鹿游于此原以是得名盖泰运之象

桃林

桃林塞在长安东四百里若有军马经过好行则牧华山休息林下恶行则决河漫延人马不得过矣